

Na osnovu člana 13. Zakona o principima lokalne samouprave u Federaciji Bosne i Hercegovine („Službene novine F BiH,“broj 49/06) i člana 24. Statuta Općine Kladanj („Službeni glasnik Općine Kladanj“, broj 9/11), Općinsko vijeće Kladanj, na sjednici održanoj 26.09.2013.godine, donijelo je

ETIČKI KODEKS IZABRANIH ZVANIČNIKA OPĆINE KLADANJ

I – UVODNI DIO

Član 1.

Etičkim kodeksom izabranih zvaničnika Općine Kladanj (u daljem tekstu: Kodeks) utvrđuju se etička načela i principi ponašanja kojih treba da se pridržavaju izabrani zvaničnici pri obavljanju svojih dužnosti. Ovim Kodeksom se takođe građani upoznaju o standardima ponašanja koja s pravom mogu očekivati od izabranih zvaničnika

Član 2.

Svrha Kodeksa je da se njegovim prihvatanjem i dosljednom primjenom uspostavi primjeren nivo korektnog odnosa i kulture dijaloga, osigura objektivnost i profesionalna odgovornost kao i spriječi bilo kakva diskriminacija u djelovanju i ponašanju izabranih zvaničnika, u cilju promovisanja sveukupnog ugleda Općinskog vijeća i Općine Kladanj.

II – PRIMJENA KODEKSA

Član 3.

Ovaj Kodeks se odnosi na sve izabrane zvaničnike, kojima je mandat povjeren putem neposrednih izbora (općinski vijećnici i općinski načelnik), kao i na sve izabrane zvaničnike kojima je mandat povjeren putem neposrednih izbora od strane Općinskog vijeća (članovi stalnih i povremenih radnih tijela, članovi upravnih i nadzornih odbora javnih ustanova i javnih preduzeća, koje imenuje Općinsko vijeće ili Općinski načelnik) . Principi i pravila ponašanja utvrđeni ovim Kodeksom primjenjuju se tokom cijelog izbornog mandata izabranih zvaničnika.

III - OSNOVNI PRINCIPI PONAŠANJA

1. OPĆE OBAVEZE

Član 4.

Izabrani zvaničnici, preuzimanjem dužnosti obavezuju se na poštivanje ustava, zakona, Statuta Općine Kladanj, ovog Kodeksa i drugih propisa, zanemarujući političku naklonost.

Član 5.

U vršenju povjerene dužnosti, izabrani zvaničnici će se zalagati za ljudska prava i slobode, ravnopravnost naroda i građana, ravnopravnost spolova te primjerenim ponašanjem pridonositi ugledu funkcije koju obavljaju.

Član 6.

Izabrani zvaničnici će obavljati povjerenu dužnost savjesno i odgovorno, uz naglašenu otvorenost i spremnost da odgovaraju za svoje odluke, djelovanje i ponašanje.

Član 7.

U obavljanju svojih dužnosti, izabrani zvaničnici će ličnim primjerom i ponašanjem uvažavati prava i ovlaštenja drugih izabranih zvaničnika, suzdržavat će se od podsticanja ili pomaganja u izvršavanju povjerenih dužnosti radi dovođenja u privilegovan položaj sebe ili drugih izabranih zvaničnika.

2. POSEBNE OBAVEZE

Član 8.

Izborna kampanja

Kandidati u toku izborne kampanje za Općinsko vijeće i Općinskog načelnika težit će da glasove birača pridobije poštenim i argumentovanim istupom, suzdržavajući se od uvrijedljivog riječnika i klevete, podsticanja i korištenja prijetnji.

Član 9.

Zabrana favoriziranja

Izabrani zvaničnici u obavljanju dužnosti neće zloupotrebjavati svoja ovlaštenja u svrhu vlastitog interesa, te interesa i koristi drugih pojedinaca ili grupa, s kojim su interesno povezani.

Član 10.

Sukob interesa

Izabrani zvaničnici će se u svakom slučaju pridržavati odredaba zakona koji uređuju nespojivost funkcija izabranog zvaničnika sa funkcijom ili položajem u lokalnoj upravi, državnom organu, preduzeću ili ustanovi. U svim slučajevima nastupanja sukoba interesa ili nespojivosti funkcija, izabrani zvaničnik je dužan bez odlaganja prijaviti takav slučaj i odstupiti sa pozicije.

Kod eventualnog ličnog interesa vijećnici će to javno iskazati na sjednici prije rasprave i glasanja i neće učestvovati u izjašnjavanju, uvažavajući i propise o sukobu interesa i ograničenja istovremenog obavljanja dvije ili više funkcija.

Član 11.

Lične nadležnosti

Pri obavljanju diskrecionih ovlašćenja i djelovanju prema ličnom nahodjenju, izabrani zvaničnici neće za sebe, ni za druga lica osiguravati bilo kakve pogodnosti, niti davati prednost pojedincu ili grupi sa ciljem ostvarivanja direktne ili indireknte koristi.

Član 12.

Donošenje odluka

Odluke izabranih zvaničnika, u vršenju dužnosti zasnivat će se na zakonitosti, objektivnosti, odgovornosti i saglasnosti sa općim interesom, uz spremnost na odgovornost za svoje odluke.

Član 13.

Način komuniciranja

Izabrani zvaničnici će u ostvarivanju komunikacije izbjegavati obmanjivanje, manipulaciju, samopromociju i neučtivost u kreiranju i vođenju dijaloga, poštujući jednaka prava svih na uvažavanje i poštivanje dostojanstva ličnosti.

Član 14.

Povjerenje javnosti

Izabrani zvaničnici treba da usmjere svoje ponašanje u skladu sa javnim interesom, i doprinesu povjerenju javnosti prema institucijama koje predstavljaju

Član 15.

Sprječavanje korupcije

Izabrani zvaničnici će se u obavljanju svojih odgovornih dužnosti suzdržati od bilo kakvog ponašanja koje bi se prema važećem domaćem ili međunarodnom krivičnom zakonodavstvu, moglo okarakterizirati kao korupcija.

Član 16.

Finansijska disciplina

Izabrani zvaničnici će se pridržavati budžetske i finansijske discipline koja obezbeđuje ispravno upravljanje javnim sredstvima, na način regulisan važećim zakonima.

IV -ODNOS IZABRANIH ZVANIČNIKA PREMA OPĆINSKOJ UPRAVI

Član 17.

Odnos prema općinskoj upravi

U obavljanju svojih dužnosti izabrani zvaničnici će uvažavati prava i ovlaštenja državnih službenika i namještenika.

Izabrani zvaničnici neće zahtjevati od uposlenih u Općinskoj upravi da preduzmu ili da propuste da preduzmu bilo kakve radnje, kako bi na taj način sebi ili drugom pribavili direktnu ili indirektnu korist.

Član 18.

Odnos s medijima

U medijskim nastupima, izabrani zvaničnici će pružiti sve potrebne informacije vezane za obavljanje njihovih dužnosti, izbjegavajući pri tom obmanjivanje i manipulaciju.

Izabrani zvaničnici neće medijima davati povjerljive informacije, niti informacije koje se odnose na privatni život izabranih zvaničnika i drugih lica.

Izabrani zvaničnici će podsticati i promovisati svaku mjeru kojom se povećava otvorenost prema javnosti.

Član 19.

Odnos prema građanima

Izabrani zvaničnici će djelovati isključivo u korist svih građana.

U službenoj i privatnoj komunikaciji sa građanima izabrani zvaničnici će se strpljivo, pristojno i ljubazno ponašati.

Član 20.

Ponašanje na sjednicama

Vijećnici će poštovati sve standarde koje propiše Općinsko vijeće. Svojim ponašanjem vijećnici će uvijek štiti ugled Općinskog vijeća.

Vijećnici su dužni naročito:

- a) redovno prisustvovati sjednicama Općinskog vijeća i radnih tijela Vijeća. Odsustvo sa sjednice dopušteno je samo u opravdanim situacijama,
- b) poštivati zakazano vrijeme sjednice, a u slučaju kašnjenja dužni su ulaziti u salu na način da ne ometaju rad sjednice,
- c) da ne napuštaju sjednicu bez saglasnosti predsjedavajućeg Općinskog vijeća,
- d) da ne prekidaju govornika obraćanjem sa mjesta na kojem sjede,

- e) da, u radu Vijeća, ne iskazuju pristrasnost prema određenoj političkoj ideologiji, rasi, vjeroispovjesti, naciji, spolu,
- f) da u svojim obraćanjima, kao i prilikom donošenja odgovarajućih odluka ne favorizuju treća lica, grupacije i pojedince kao i lične interese,
- g) da, u svojim obraćanjima, ne koriste izraze i riječi koje vrijeđaju ili omalovažavaju drugoga i ljudsko dostojanstvo i narušavaju ugled Općine i Općinskog vijeća, te potiču na mržnju i nasilje,
- h) da ne razgovaraju međusobno, osim ako je to neophodno, pod uslovom da ne ometaju tok sjednice,
- i) da nekoriste mobitele na način da se ometa tok sjednice,
- j) da nastoje da prikladno i uredno odjeveni dolaze na sjednice

Predsjedavajući Vijeća ne smije dopustiti da vijećnik ili drugi učesnik na sjednici govori prije nego što dobije riječ, te je dužan upozorenjem ili oduzimanjem riječi zaštititi dignitet vijećnika od strane učesnika na sjednici, koji prilikom govora koriste izraze i riječi koje vrijeđaju ili omalovažavaju ličnost i dostojanstvo vijećnika.

Odredbe Kodeksa iz stava 2. ovog člana dužni su poštovati i predsjednici, zamjenici predsjednika i članovi radnih tijela Općinskog vijeća na sjednicama radnih tijela.

Općinski načelnik je obavezan preduzeti mjere prema pomoćnicima i drugim državnim službenicima koji se neprimjereno ponašaju na sjednicama Općinskog vijeća, izlaze za govornicu bez dozvole predsjedavajućeg Vijeća, prilikom govora vrijeđaju ili omalovažavaju ličnost i dostojanstvo vijećnika, ili na drugi neprimjeren način ometaju red na sjednici.

V - PRAĆENJE KODEKSA

Član 21.

Praćenje i nadzor nad poštivanjem odredaba ovog Kodeksa vrši Komisija za praćenje primjene etičkog kodeksa, koja donosi Poslovnik o svome radu.

Komisija za praćenje primjene etičkog kodeksa je stalno radno tijelo Općinskog vijeća.

Komisija za praćenje primjene etičkog kodeksa ima tri člana.

VI - PROCEDURA PO PRIJAVI

Član 22.

Prijavu zbog povreda odredaba Kodeksa mogu podnijeti vijećnici Općinskog vijeća, predsjednici Klubova vijećnika, Kolegij vijeća, Općinski načelnik, zaposlena lica u općini, kao i svi građani.

Prijava za kršenje Kodeksa se podnosi u pismenom obliku Komisiji za praćenje primjene etičkog kodeksa, koja je dužna u roku od 30 dana razmotriti prijavu, zauzeti stav po istoj i eventualno izreći sankciju.

Prijava mora biti potpisana i uz istu podnosilac je dužan priložiti pisane ili druge dokaze na osnovu kojih smatra da je izvršena povreda etičkog kodeksa.

Anonimne prijave se neće razmatrati.

Član 23.

Komisija za praćenje primjene etičkog kodeksa održava sjednice po potrebi, ukoliko je bilo kršenja odredaba Kodeksa na sjednicama ili u slučaju da je podnesena prijava po kojoj je neophodno postupiti.

Komisija za praćenje primjene etičkog kodeksa može i po službenoj dužnosti pokrenuti i voditi postupak protiv izabраних званичника, ukoliko ima saznanja i raspoláže dokazima o učinjenoj povredi Kodeksa, a niko od ovlaštenih lica nije podnio prijavu.

Član 24.

Ako Komisija za praćenje primjene Etičkog kodeksa ocjeni da nije bilo povreda ovog Kodeksa, o tome će obavjestiti podnosioca prijave. Ako ocjeni da je od strane izabranog zvaničnika učinjena povreda neke od odredaba ovog Kodeksa, Komisija za praćenje primjene Etičkog kodeksa će dati svoje mišljenje, predložiti mjeru i o tome izvjestiti Općinsko vijeće. Općinsko vijeće razmatra, usvaja i izriče mjeru.

VII- SANKCIJE ZA KRŠENJE KODEKSA

Član 25.

Za kršenje odredaba Kodeksa mogu se izreći slijedeće sankcije:

- osuda ponašanja,
- pismena opomena i
- javna opomena.

Član 26.

Uz izrečene sankcije obavezno se izriče i mjera jednomjesečnog umanjenja vijećničkog paušala, odnosno naknade kako slijedi:

- a) uz osudu ponašanja10% vijećničkog paušala,odnosno naknade
- b) uz pismenu opomenu 30% vijećničkog paušala, odnosno naknade i
- c) uz javnu opomenu 50% vijećničkog paušala, odnosno naknade.

Uz izrečene sankcije Općinskom načelniku obavezno se izriče i mjera jednomjesečnog umanjenja plaće kako slijedi :

- a) uz osudu ponašanja4%
- b) uz pismenu opomenu 6%
- c) uz javnu opomenu 8%.

Mjeru jednomjesečnog umanjenja vijećničkog paušala, naknade, odnosno plaće, koja se izriče uz propisane sankcije, izvršava:

- nadležna općinska služba obustavljanjem prilikom isplate mjesečnog paušala, naknade radnim tijelima i plaće Općinskom načelniku ,
- javna preduzeća i ustanove obustavljanjem prilikom isplate naknade članovima nadzornih i upravnih odbora.

Član 27.

Osuda ponašanja

Osuda ponašanja izriče se za lakše oblike kršenja odredaba Kodeksa.

Lakši oblici kršenja odredaba Kodeksa su: narušavanje reda na sjednicama Općinskog vijeća i radnih tijela Vijeća na način kako je navedeno u članu 20. stav (2) tačke b), d), e), h) i), j), i članu 20. stav (3).

Član 28.

Pismena opomena

Pismena opomena izriče se za teže oblike kršenja odredaba Kodeksa.

Teži oblici kršenja odredaba Kodeksa su:

- a) nepoštivanje odredaba člana 20. stav (2). tačka a) i c),
- b) neprimjereno ponašanje u izbornoj kampanji iz člana 8. Kodeksa etike (korištenje uvrijedljivog riječnika i klevete)
- c) obmanjivanje i manipulacija građanima u medijskim nastupima član 18.Kodeksa.

d) nestrpljivo, nepristojno i neljubazno ponašanje prema građanima u službenoj i privatnoj komunikaciji član 19. stav 2 Kodeksa.

Član 29.

Javna opomena

Javna opomena izriče se za najteže oblike kršenja odredaba Kodeksa.

Najteži oblici kršenja odredaba ovog Kodeksa su:

- a) obavljanje povjerenih dužnosti na način kojim se krše odredbe člana 15. Kodeksa,
- b) neprimjereno ponašanje u izbornoj kampanji iz člana 8. Kodeksa etike (korištenje prijetnji i nasilja),
- c) neobjelodanjivanje privatnog interesa prilikom razmatranja određenog pitanja na sjednici Općinskog vijeća i glasanje po pitanju u kojem se ima privatni interes (član 10. Kodeksa),
- d) narušavanje reda na sjednicama Općinskog vijeća i radnih tijela Općinskog vijeća, na način kako je utvrđeno u članu 20. stav 2. tačka f) i g) Kodeksa,
- e) zahtijevanje od zaposlenih u općinskoj upravi da preduzimaju ili da propuste da preduzmu bilo kakve radnje kako bi na taj način sebi ili drugima pribavili direktnu ili indirektnu korist (član 17. stav 2. Kodeksa),
- f) Odavanje povjerljivih informacija i informacija koje se odnose na privatni život izabranih vijećnika i drugih lica (član 18. stav 3. Kodeksa)

Javna opomena se javno objavljuje na sjednici Općinskog vijeća, a objaviće se i na web stranici Općine Kladanj u trajanju od 30 dana.

VIII - ZAVRŠNE ODREDBE

Član 30.

Izabrani zvaničnici će se upoznati sa sadržajem ovog Kodeksa, te njegovim principima sa izjavom da ih prihvataju i podržavaju.

Obaveza Vijeća je da svojom aktivnošću osigura u javnosti promociju ovog Kodeksa.

Ovaj Kodeks stupa na snagu osmog dana od dana objavljivanja u „ Službenom glasniku Općine Kladanj“.

OPĆINA KLADANJ
OPĆINSKO VIJEĆE
Broj: 01-05-2950/13
Kladanj, 26.09.2013.godine

PREDSJEDAVAJUĆI
Općinskog vijeća
Refik Avdić, v.r.